

Gelandangan tak manfaat kemudahan Anjung Singgah

Tumpu stesen bas, kaki lima sekitar Jalan Chow Kit sebagai tempat berteduh

- Berita Harian
- 3 Jan 2017
- Oleh Nor Shayaumil Qhairil Eemann



Sebahagian ahli Kelab Pusat Panggilan 1Malaysia mengagihkan sumbangan seperti alat kelengkapan mandian, pakaian dan makanan kepada golongan gelandangan di sekitar bandar raya Kuala Lumpur.

Anjung Singgah sudah disediakan untuk gelandangan, sebagai kemudahan tempat tinggal sementara, makan minum dan sebagai pusat intervensi bagi mempersiapkan mereka menempuh cabaran hidup agar tidak terpinggir daripada arus pembangunan negara.

Bagaimanapun, masih ramai dalam kalangan mereka menjadikan beberapa lokasi tumpuan seperti di stesen bas dan kaki lima kawasan sekitar Jalan Chow Kit di Kuala Lumpur sebagai tempat berteduh dengan hanya beralaskan kotak.

Jejas imej ibu negara

Keadaan ini mencemarkan imej ibu negara yang menjadi tumpuan pelancong dari dalam dan luar negara.

Menyedari hakikat itu, Kelab Pusat Panggilan 1Malaysia (1MOCC) menerusi Unit Pemodenan Tadbiran dan Perancangan Pengurusan Malaysia (MAMPU), baru-baru ini, mengambil inisiatif dengan mengedarkan alat kelengkapan mandian kepada golongan itu.

Penyelaras Program, Mohd Aidil Ibrahim, berkata tanggungjawab sosial korporat itu dilaksanakan dengan kerjasama pertubuhan bukan kerajaan (NGO), The Helping Hand Kuala Lumpur yang berpengalaman membantu golongan gelandangan.

“Kami mengedarkan sebanyak 350 bekas alat kelengkapan mandian dan pakaian terpakai kepada golongan ini kerana tahu banyak lagi NGO yang membantu dengan memberi bantuan makanan serta barang keperluan yang lain,” katanya.

Cari dana

Sementara itu, sekretariat The Helping Hand, Diana Abd Manaf, berkata pihaknya akan cuba mencari dana untuk membantu golongan gelandangan ini.

“Boleh dikatakan banyak NGO dan orang perseorangan membantu golongan ini kerana ingin berbakti kepada masyarakat yang serba kekurangan.

“Mungkin ada sesetengah pihak yang melihat bantuan yang diberikan ini akan membuatkan golongan ini terus berasa selesa dan tidak mahu berubah demi masa depan yang lebih baik. Namun sebagai NGO yang bertanggungjawab, kami akan berusaha membantu mereka, memberi sokongan dan dorongan untuk mengubah kehidupan,” katanya.

Beliau berkata, setiap aktiviti sumbangan yang dijalankan juga dikongsikan di media sosial seperti Instagram dan Facebook sebagai dorongan kepada pihak lain untuk turut memberi bantuan kepada golongan berkenaan.